

四庫全書

史部

欽定四庫全書

史部

唐會要卷五十四至  
六

詳校官編修臣溫汝适

編修臣程嘉謨覆勘

總校官降調編修臣倉聖脉

校對官中書臣王學海

謄錄監生臣賀賢智

欽定四庫全書

唐會要卷五十四

宋王溥撰

省號上

門下省

武德初因隋舊制為門下省龍朔二年二月四日改為東臺咸亨元年十二月二十三日改為門下省光宅元年九月改為鸞臺神龍元年二月四日改為門下省開

元元年十二月一日改為黃門省五年九月六日改為  
門下省至今不改

中書省

武德元年因隋舊制曰內書省三年三月十日改為中書  
省龍朔年改為鳳閣神龍初年復中書省改元元年改紫  
微省五年復舊為中書省故事凡王言之制有七一曰冊書  
立后建嫡封樹藩屏寵命尊賢臨軒備禮則用之二曰制  
行大賞罰授大官爵釐革舊政赦宥降恩則用之三曰慰

勞制書褒賢贊能勸勉勤勞則用之四曰發日敕謂御書發敕也增減官員廢置州縣徵發兵馬除免官爵授六品以下官處流以下罪用庫物五百段錢二百千倉糧五百石奴婢五十人馬五十疋牛五十頭羊五百口以上則用之五曰敕旨謂百司之承旨而為程式奏事請施行者六曰論事敕書慰諭公卿誠約臣下則用之七曰敕牒隨事承旨而不易舊典則用之也皆宣署申覆而施行焉舊制冊書詔敕總名曰詔天授元年避諱改詔

曰制凡下之通於上有六一曰奏抄謂祭祀之支度國  
用授六品以下官斷流以下罪及除免當者並為奏抄  
二曰奏彈謂御史糾劾百司不法之事也三曰露布謂  
諸軍破賊申尚書兵部而聞奏焉四曰議謂朝之用事  
下公卿議理有異同奏而裁之五曰表六曰日狀皆審  
署申覆而施行焉覆奏畫可訖留門下省為案更寫一  
通侍中注制可印署送尚書省施行者

武德三年高祖嘗有敕而中書門下不時宣行高祖責

遲由內史令蕭瑀曰臣大業之日見內史宣敕或前後相乖者所司行之不知何所承用所謂易雖在前難必在後臣在中書日久備見其事今皇階初構事涉安危若遠方有疑恐失機會比每授一敕臣必審勘使與前敕不相乖背者始敢宣行遲晚之愆實由於此高祖曰卿能用心若此我有何憂

貞觀元年上謂侍臣曰中書門下機要之司擢才而居委任實重詔敕如有不便皆須執論比來唯覺阿旨頤

情事即有過遂無言諫諍者豈是道理若惟署敕文書而已人誰不堪何須簡擇以相委付自今已後詔勅疑有不穩必須執言

聖歷三年四月三日敕賜物中書門下省官正三品準二品四品準三品其年四月三日敕應賜外國物者宜令中書具錄賜物色目附入敕函內

神龍三年二月十九日敕諸色理訴兼抑論內狀出付中書應制敕處分者留為商量自餘並封本狀牒送所



司處分

景龍三年八月九日敕應酬賞賜須依格式迄無明文隨時比例制敕不言自今已後乃永為恒式者不得攀引為例

開元七年八月十日敕中書門下廚雜料破用外有餘者宜分取

三年十月始用黃麻紙寫詔至上元三年二月詔制敕並用黃麻紙

九年四月二十六日勅加階入三品并授官及勲封甲并諸色闕等進畫出至門下省重加詳覆有駁正者有便即落下墨塗訖仍於甲上具注事由并牒中書省

二十一年閏三月十三日敕每月當番武官番滿日過中書門下

天寶八載七月中書門下奏比來諸司使及諸郡并諸軍應緣奏事或有請中書門下商量處分者凡所陳奏皆斷自天心在於臣下但宣行制勅奏文內則不合列

請商量乃承前因循有此乖越自今已後應奏事一切更不合請付中書門下如有奏達聽進止勅旨從之  
乾元三年四月二十六日勅諸司使諸州府進奏文狀應合宣行三紙已上皆自寫宣付四本中書省宣過中書省將兩本與門下省

寶應二年四月二十二日內外六品以下正員自今已後差主事一人令史四人專知至建中三年閏正月十八日中書門下奏准貞觀故事京常叅官及外官五品

已上每有除拜中書門下皆立簿書謂之具眞取其年  
資以為遷授此國之大經也自艱難已來此法遂廢垂  
拱三十載伏望自大厯十四年已來量署具員據前資  
見任員量與改轉從今已後刺史四考郎中起居侍御  
史各兩考餘官各三考與轉其升進黜退並准故事處  
分仍下天下州縣審勘責前資見任其鄉貫厯任官諱  
同具狀中書門下

廣德二年三月十四日勅中書門下兩省直省自今已

後所補不得取郎將已上官 大曆十三年四月十六  
日勅中書門下先置法官兩人宜傳 建中三年六  
月詔中書門下兩省各置印一面 四年六月中書門  
下兩省狀應送諸司文狀檢勘節限中考文狀等並是  
每年長行之事尚書省各依限錄奏舊例經一宿即出  
如經三日不出請本司更修單狀重奏又三日不出即  
請本司長官面奏取進止其內狀到各令本司兩日內  
具省案及宜黃送到中書依前件所定限勘會宣下即

事免稽滯及准開元十九年四月勅應加階并授及  
勲封甲并諸色闕等進畫出至門下省重加詳覆駁正  
者宜便注簿落下以墨塗訖仍於申上宜注事由牒中  
書省敕旨從之二年五月二十八日勅中書門下兩  
省供奉官及尚書省御史臺現任郎官御史等自今已  
後諸司諸使並不得奏請任使仍永為恒式

長慶元年正月制自今已後中書門下所有除授宜依  
元和二年具員勅處分

太和三年四月中書門下奏內外文武官除授伏以為  
官擇人寔資進選舉能考績固切旁求必當按實循名  
聽言觀行事合先於詢衆道必惡於自媒進退之間風  
俗所繫近日人多爭競跡罕貞修或日詣宰司自陳功  
狀或上瀆宸衷曲祈恩授無受爵讓能之賢啓矜能伐  
善之弊亦有粗因勞績以授官榮及居今任別無課効  
唯引向前所事狀祇希更與遷陞凡是此流稍要立制  
伏望自今後應緣官闕須有除授先選吏跡有聞行已

務寔者隨才獎用如有志涉浮躁事近激求者量加擯斥所覲官修其方人思勵行勅旨宜依其年五月中書門下奏內外常叅官改轉伏以建官蒞事曰賢與能古之王者用以致理不聞其積日以取貴踐年而遷秩者也況常人自有常選停年限考式是舊規然猶慮拘條格或失茂異遂於其中設博學宏詞書判拔萃三禮三傳三史等科目以待之令不限選數聽集其實限年考者非擇賢能之術也故予違汝弼唯繫人才黜幽陟明



在課職業今據元和二年五月十八日具敕敕內常叅  
官並限年考各與遷轉則官修者沈滯職曠者僥倖恐  
非朝廷循名責實之意獎厲賢勞之道頻奉進止數遣  
商量須令百吏勤職衆官得人舉直措枉行於授受之  
際伏望從今以後內外常叅官並不論年考議事而遷  
位位均以才才均以望位望均然後以日月班之而第  
用之則冀有司竭力盡知務修其職而以赴功唯御史  
臺刑憲是司憂責頗重其三院御史望納舊敕例比量

處分敕旨依奏

九年十二月勅中書門下吏部各有甲歷名為三庫以防踰濫如聞近日請處奏官不經司檢尋未免姦偽日起今已後諸司諸使諸道應奏六品以下諸色人稱舊有官及出身請改轉并請授官可與商量者除進士及登科衆所聞知外宜令先下吏部及中書門下及三庫委給以舍人吏部格式郎中各與甲庫官同檢勘具有無申報中書門下審無異同者然後依資進擬如諸司

諸道奏論不實以有為無者臨時各加懲罰務使仕進稽實永絕僥倖

開成二年十二月中書門下奏武官舍下郎將等其堪送名者請中書門下准吏部送名例磨勘仍先過堂然後批擬從之

三年二月敕中書文狀悉在中書斷割裁量須歸根本如關錢穀刑獄等事有宣付諸司處置者宜更令覆奏候正敕施行

門下侍郎

龍朔二年改為東臺侍郎咸亨二年改為黃門侍郎垂拱元年二月二日改為鸞臺侍郎神龍元年復為黃門侍郎天寶元年二月二十日改為門下侍郎乾元元年改為黃門侍郎大厯二年十一月四日復為門下侍郎其年月九日陞為正三品中書侍郎同門下之稱至今不改

武德二年四月溫大雅為黃門侍郎至五年三月弟彥

博又為中書侍郎對居近禁高祖謂曰我起義晉陽為卿一門耳

貞觀十八年黃門侍郎褚遂良上疏曰即日内外官人諸王僚佐咸云陛下供給皇弟頓少於親王大臣深知形跡不奏私說竊語殊非光益臣伏事聖主奉若天心豈不恐其多財縱溢或至自敗必不得積貨驕盈寧使儉急不足雖不比於皇子亦須微允物望臣是以謹訪荆韓漢魯四弟自足資財滕密霍道四王尤為缺少臣

於芳春殿冒死奏聞伏惟天明必記臣語若厚於諸弟人皆聞見六月四日詔便是至公若供給諸弟事皆儉陋即似陛下于昆季情薄臣是以不避斧鉞更敢陳聞昔漢明帝每賜子弟必語羣臣云不得使朕子多於先帝子美哉斯言王者德音終後漢皆以明帝為法臣聞君施教令謂之風人隨上行謂之俗陛下厚於諸弟太子亦厚於諸弟相承恩篤豈不美哉伏願陛下疑闕短者因而賜之所用不多德音流布

神龍元年五月武三思恃寵嘗請託於黃門侍郎宋璟正色謂曰當今復子明辟王宜以侯就第何得尚干朝政王獨不見產祿之事乎

開元二年八月李嶠為黃門侍郎多所校正紫微令姚崇遂薦為紫微侍郎外託薦賢其實引在已下去其糾駁之權建中二年十月門下侍郎盧杞密啓中書主事過咎逐之楊炎怒曰中書吾局也更有過吾自治之奈何相侵耶

中書侍郎

武德元年因隋舊制號內史侍郎三年三月十日改為  
中書侍郎龍朔中改為西臺侍郎咸亨中改為中書侍  
郎垂拱元年二月改為鳳閣侍郎神龍元年二月四日  
又為中書侍郎開元元年十二月一日改為紫微侍郎  
大歷二年十一月十四日升為正三品五年九月六日  
復為中書侍郎貞觀十九年中書侍郎許敬宗以太子  
承乾官僚多被除削久未收叙上疏曰竊見廢官僚五



品以上除名棄斥頓歷寒溫但庶人疇昔之年身處不  
疑之地包藏悖逆陰結宰臣所同奸謀多連宗戚禍生  
慮表非可防萌宮內官僚迴無關及今乃投鼠及器孰  
謂無冤焚山毀玉稍同遷怒伏尋先典例有可原昔  
吳國陪臣則爰絲不坐於劉濞昌邑中尉則王吉免緣  
於海昏譬諸藥布乃策名於彭越比於田叔亦委質於  
張敖主以凶逆陷于誅夷臣以忠良荷彼收擢今張玄素  
令狐德棻趙弘智裴宣機蕭鈞等並砥節勵操有雅望

於當朝經明行修播芳名於天下或以直言而遭箠撲或以忤旨而見猜嫌一概雷同並罹天憲恐於王道傷在未弘其年四月中書侍郎顏師古以譴免職溫彥博言於太宗曰師古諳練政事長於文誥時無逮者冀上復用之太宗曰我自舉一人公勿憂也於是以岑文本為中書侍郎專典機密及遷中書令歸家有憂色其母怪而問之岑文本曰非勲非舊濫登寵榮位高責重古人所以憂耳親賓有來賀者輒曰今日受弔不受賀及

興遼東之役凡所支度一切委之神用頓竭太宗見而  
憂之謂左右曰文本今與同行恐不與我同返至幽州遇  
疾暴卒時年五十一垂拱三年鳳閣侍郎劉禕之嘗竊  
謂人曰太后何用臨朝稱制不如返政以安天下之心  
則天聞之特令肅州刺史王本立推鞠本立宣敕示禕  
之禕之曰不經鳳閣鸞臺宣過何名為敕則天大怒以  
為拒捍制使特賜死

開元元年十二月上詔宰臣謂曰從工部侍郎有得中

書侍郎者否對曰任賢用能非臣等所及上曰蘓頌可  
除中書侍郎仍令宰臣宣旨秘入政事院便供政事食  
明日加知制誥

今知制誥有政事食者自頌始也及入謝固辭上曰  
朕常欲用卿每一好官缺即望諸宰相論及此皆卿  
之故人遂無言卿者朕常歎息中書侍郎朕極重惜  
自陸象先故官後朕每思之無出卿者二年弟誵除  
給事中頌屢陳情上曰古來有內舉不避親耶頌曰  
晉大夫祁奚是也上曰若然朕自用蘓誵何得屢言  
近日卿父子猶同在中書兄弟有何不得卿言非至  
公也三年二月上謂曰前朝有李嶠蘇味道時人  
謂之蘓李朕今有卿及李嶠亦不讓之卿所制文朕  
自識之自今以後每進書皆別錄一本云臣某進朕

與留中迄今  
已為故事

十一年九月中書令張說薦崔沔為中書侍郎或謂沔  
曰今日之中書皆是宰相承宣制命侍郎雖是副貳但  
署位而已甚無謂也沔曰不然設官分職下上相維各  
申所見方為制理豈可俛然偷安而懷祿仕也自是每  
有制敕及曹事沔多異同張說頗不悅焉

建中元年中書侍郎平章事崔祐甫薨冊贈太傳故事  
中書侍郎未嘗有三師者上以祐甫謇謇有大節特寵

異之

左右散騎常侍

武德令以為從三品散官貞觀十七年六月四日改為  
職官置兩員以黃門侍郎劉洎為之隸門下省顯慶三  
年十二月二十八日分左右各兩員其左隸門下省右  
隸中書省龍翔年改左右侍極咸亨年改為左右常侍  
即廣德二年五月二十二日陞為正三品中書門下省  
各加置四員興元元年正月二十九日各加一員貞元

四年正月一日敕元額四員其新負宜依元數

貞觀十七年散騎常侍劉洎諫詰難公卿表曰臣聞帝王之與凡庶聖哲之與庸愚上下相懸擬倫斯絕是知以至愚而對至聖以極卑而對極尊徒思自強不可得也陛下降恩旨假慈顏凝旒以聽其言虛襟以納其說猶恐羣下未敢對揚况動神機縱天辯飾詞以折其理援古以排其議欲令凡庸何階應答臣聞皇天以無言為貴聖人以不言為德老君稱大辨若訥莊生言至道

無文此皆不欲煩也是以齊侯讀書輪扁竊笑漢皇慕  
古長孺陳譏此亦不欲勞也且多記則損心多語則損  
氣心氣內損形神外勞初雖不覺後必為累須為社稷  
自愛豈為性好自傷乎竊以今日昇平皆陛下力行所至  
欲其長久匪由辨博但當忘彼愛憎慎茲取舍每事敦  
樸無非至公若貞觀之初則可矣至如秦政強辨失人  
心於自矜魏文宏才虧衆望於虛說此才辨之累較然  
可知矣伏願畧茲雄辯浩然養氣簡披緇圖淡焉怡目



固萬壽於南岳齊百姓於東邱則天下幸甚

手詔答曰非慮無以

臨下非言無以述慮比有談論遂至煩多輕物驕人恐由茲道神形心氣非足為勞今聞讜言虛懷以改

寶應二年五月一日敕散騎常侍宜各置叅官兩人令自簡擇聞奏叅典亦置兩人

興元元年二月以奉天解圍百僚稱賀右常侍賈隱林拜舞因質言曰陛下性多太急不能容忍若舊性不改雖朱泚敗亡臣亦恐憂未艾也上虛懷納之

貞元四年二月敕左右散騎常侍是中書門下正三品

官謂之侍極宰臣次列除特委方面者餘不合兼任使  
先已授者宜改與別官自今已後更不得注授

長慶四年五月諫議大夫李渤奏據六典常侍奉規諷  
其官久不舉職習以成例若設官不責其事不如罷之  
以省其費苟未能罷臣請特勅令准故事行其職業從之  
太和五年二月神策中尉王守澄誣奏宰相宋申錫謀  
逆文宗即令追捕左散騎常侍崔玄亮極諫上乃改容  
勞之申錫方免死責授開州司馬

給事中

武德元年因隋舊制為給事郎三年三月十日改為給事中龍朔中改為東臺舍人咸亨改為給事中

貞觀十五年太宗臨軒謂侍臣曰朕所以不能恣情欲取樂當年而勵精苦心正為蒼生且我為人主兼持將相之事豈不是奪公等名昔漢高得蕭曹韓彭天下寧晏舜禹湯武有稷卨伊呂四海乂安此事朕並兼之給事中張行成諫曰陛下聖德含光規模宏遠雖文武之

烈實兼將相何用臨朝對衆與並校量以萬乘至尊共  
臣下爭功哉臣聞天何言哉四時行焉臣輒陳狂直伏  
待殛醢

十六年刑部奏請反叛者兄弟並坐給事中崔仁師駁  
之曰誅其父子足警其心此而不恤何憂兄弟議遂寢  
開元二十一年二月定安公主初降王皎後降韋濯  
又降博陵崔銑銑又卒及公主薨皎子駙馬王繇請與  
皎合葬敕旨依給事中夏侯銛駁之曰公主初昔降婚

梧桐半死逮乎再醮琴瑟兩亡則生存之時已與前夫  
義絕殂謝之日合從後夫禮葬今若依繇所請却祔舊  
姻但恐魂若有知王皎不納於幽壤死而可作崔銑必  
訴於玄天國有典章事難逾越原繇此意雖申罔極之  
情本禮而行或致不稽之誚銛謬膺駁正敢曠司存請  
旁移禮官并求指定下太常寺請議公主令與王皎合  
葬可否報之

貞元十八年二月以前攝浙東團練副使試大理評事

兼監察御史齊總為衢州刺史羣議以為超獎過當至  
門下給事中許孟容上表封還曰臣伏見今恩制除衢  
州刺史齊總臣愚竊有所慮恐驚物聽不敢聞於陛下  
若以兵戎之地或有不得已非次擢授者今衢州無他  
虞齊總無殊績忽有此超授羣情驚駭又齊總是判官  
今詔敕擢浙東觀察留後攝都團練副使向來未有敕  
令使用此下詔尤恐不可總若可拔不假此舉致使人  
疑陛下臨御以來凡所選用皆為至公既非聖情所難

改移即臣下安得不動有論諍若齊總必有可錄陛下  
必須酬能即明書勞課超一兩資與改今臣聞四海舉  
朝之人不知齊總功能衢州浙東大郡自大理評事兼  
監察授之遐邇不甘凶惡騰口伏乞聖慈少回神理覽  
臣所奏允臣之請陛下若謂臣不切不懇伏乞陛下試  
停此詔密使人察聽必賀聖明聞納必賀聖朝無私臣  
授中官謝具日已面奏詔敕有不便者伏請封進今齊  
總詔謹隨狀封進時左補闕王武右補闕劉伯芻復上

疏言之由是詔書留中不出後數日不得雨不親事特  
開延英召孟容對上慰諭開納曰使百事皆如卿朕何  
憂也給事中自袁高俞廬已後未嘗有可否時齊總竭  
浙東進奉超授逾等江淮之間人多困急無不罪總及  
此四方聞者皆感上聖明虛心之德嘉孟容之當官不  
面從其年八月以嶺南節度掌書記試大理評事張貞  
元為邕州經畧使給事中許孟容上疏張貞元次非遷  
授右補闕張正一劉伯芻繼有封章上命中使宣諭孟



容詔亦遂止

十九年六月給事中孟容上疏曰臣竊聞陛下數勅有司走於羣望祈於百神而密雲不雨首種未入豈觴醪有闕巫祝非誠抑陰陽適然豐歉前定何聖意精至甘澤未答也臣歷觀自古天人交感未有不由百姓利病之急者切者邦家教令之大者遠者京師是萬國所會強幹弱枝自古通規其一年稅錢及地租出入一百萬貫石伏冀陛下即日下令全放免之其次三分放二使旱涸之際

免更流亡若播種無望征斂如舊則必愁怨遷徙不顧墳墓矣臣愚以為德音一發膏澤立應變災為福期在斯須戶部所收掌錢非度支歲計本防緩急別用今此歉旱直支一百餘萬貫代京兆百姓一年差科寔陛下巍巍睿謀天下鼓舞歌揚者也復省察庶政之中有流移征防當還而未還者徒罪禁錮當釋而未釋者逋懸饋送當免而未免者沉滯鬱抑當伸而未伸者有一於此則特降明命令有司條晰三日內聞奏其當還當釋

當免當伸者仍詔下之日所在即時施行臣愚以為如此而天不鑒歲不稔從古未之有也疏寢不報

元和三年以國子司業李藩為給事中時制敕有不可遂於黃敕後批之吏白宜別奏藩曰祇是文狀豈曰批敕裴垪言於上以為有宰相器俄而鄭絪罷免遂拜藩門下侍郎平章事

四年三月以淮南節度判官孔戣為衛尉寺丞分司東都勘嘗為左昭義節度使盧從史數以事爭論不從因

謝病去從史強以禮遣而陰銜之居東都為淮南節度使李吉甫所辟而從史忿嫉累請貶降始元中姑息節將其從事有不合意或知其邪心欲免去則誣以他罪論奏更不驗理或黜或徙訖貞元軍府化之至是上雖不許猶授以散員制既下給事中呂元膺封還奏曰孔戡以公正為盧從史所忌且歷職已久吉甫以宰相出鎮辟請非涉嫌疑推類言之河陽節度行軍司馬楊同皎史官崔周正或處禁近或萃戎府皆為吉甫奏在幕

庭今從史以嫌忿干黷朝典豈可曲徇其志且孔戡官  
序雖非黜退但因此改易則長奸邪之心臣恐忠正之  
士各懷疑懼事不可許上令中使宣諭元膺制書乃下  
其年十月以同州刺史呂元膺復為給事中初元膺  
自給事中除同州刺史及入謝上問以時政得失元膺  
論奏詞甚激切上嘉其剛正異日謂宰臣曰呂元膺有  
讜言直氣今欲留左右使言得失卿等以為何如李藩  
裴均進賀曰陛下納諫超冠前王乃宗社無疆之福臣

等不能廣求直士又不能數進直言孤負聖心合當罪責今請以元膺復給事中以備顧問上悅而從之

七年七月瓊林庫使奏巧兒舊挾名敕外別定一千三百四十六人請宣下內府為定額特免差役時給事中薛存誠以為此皆奸人竄名以避徭役不可以許又咸陽尉袁儋與鎮軍相競軍人兼理遠肆侵誣儋反受罰一敕繼志存誠皆執之上聞甚悅命中使嘉勞由是選拜御史中丞十四年三月以撫州司馬正令孤通為右

衛將軍給事中崔植封詔上言通嘗刺壽州用兵失律  
前罪未塞不宜遂加獎用上命宰相論植以通父彰有  
功不忍棄其子詔遂行 其年六月判度支皇甫鏞重  
奏諸道州府監院每年送上兩稅榷酒鹽利米價等足  
段加估定數又奏近年天下所納鹽酒等利擾估者一  
切追徵詔既可給事中崔植抗論以為用兵歲久百姓  
凋殘往者雖估踰其實今固不可復追疏奏命宰相召  
植宣旨嘉論許輟已行之詔物議美之 十五年閏正

月上曰諫官給事中若除授有司政乖允當各令論駁  
舉其職業時以李遜為浙東道監察使有政能入遷為  
給事中嘗密論時政以為事君之義有犯無隱陳誠豈  
必擇辰今君臣敷奏乃俟隻日是畢歲臣下睹天顏獻  
可替否能幾憲宗嘉之遷戶部侍郎

長慶初穆宗皇帝觀諸軍雜樂嘗召給事中丁公著問  
曰比聞外間自公卿至庶士多為酣宴皆極歡娛此蓋  
時和人安有足撫慰公著對曰誠有此事然以臣愚見



風俗如此亦不足佳百司所職漸恐煩勞聖慮上曰何故公著對曰賓嘉之禮古人所重皆務達誠展敬不繼以淫詩人所以美樂且有儀譏其屢舞前代名士會賓客者或清談賦咏雅歌投壺期以杯觴獻酬不至於亂國家自天寶已後風俗奢靡宴處羣飲以諠譁沉湎為樂而居重位乘大權者優雅倨肆於公吏之前曾無愧恥公私相效漸以成俗由是物務多廢獨聖心求理安得不勞宸慮乎陛下方弘本草獎特降訓命禁其過差

則天下幸甚上嘉其言

太和二年八月敕凡制命須行事有不可給事中職合  
封進省審既畢宣布百司稽停晷刻皆著律令自今尚  
書省御史臺所有制敕及官屬除不當封章上論其有  
事狀分明亦在舉按指事據實更言風聞及滯詔旨并  
不放上如郎官御史出使訪聞按舉自準前後敕文不  
在此限五年將作監王堪修奉太廟弛慢罰俸仍改官  
為太子賓客制出給事中李固言封還曰東宮調護之

地不可令被罰弛慢之人處之乃改均王傳

開成三年八月敕給事中封駁制敕宜令季終具所駁聞奏如無亦宜聞奏

會昌五年十二月給事中韋弘景上疏抗論中書權重三司錢穀不合相府兼領宰相李德裕論奏曰臣等昨於延英候對恭聞聖旨常欲朝廷尊臣下肅此是陛下深究理本也臣按管子云凡國之重器莫重於令令重則君尊君尊則國安國安在於尊名尊名在於行令君

人之理莫要乎出令故曰虧令者死益令者死不行令者死不從令者死又曰行令于上而下論可否是上失其柄下繫于人也自太和以來其風大弊令出于上非之于下昨韋弘景所論宰相不合兼領錢穀臣等輒以事體陳聞昔匡衡云所謂大臣者國家之股肱萬姓所瞻仰明主所慎擇傳曰下輕其上賤人圖柄則國家搖動弘景受人指道輒獻封章是賤人圖柄矣蕭望之漢朝名儒為御史大夫奏云今歲首日月少光罪在臣等

上以望之意輕丞相乃下御史詰責賈誼有云人主如  
堂羣臣如陛陛高則堂高亦由將相重則君上尊其勢  
然也昔東漢處士橫議遂有黨錮事起此事深要懲絕  
上然之弘景乃坐貶官時李德裕在相位久朝臣為其  
所抑者皆怨望之洎崔鉉杜悰罷相後中貴人屢言德  
裕太專上不悅故白敏中教弘景有此奏

唐會要卷五十四

欽定四庫全書

唐會要卷五十五

宋 王溥 撰

省號下

中書舍人

武德初因隋號為內史舍人三年三月十日改為中書舍人龍朔中改為西臺舍人咸亨元年復為中書舍人光宅改為龍閣舍人神龍復改為中書舍人開元元年

十二月一日改為紫微舍人五年復為中書舍人

貞觀九年中書舍人高季輔上封事曰時已平矣功已成矣然而刑典未措何哉良由謀猷之臣不弘簡易之政臺閣之吏昧於經遠之道執憲者以深刻為奉公當官者以侵下為益國未有坦平恕之懷副聖明之旨伏願隨方訓誘使各揚其職敦樸素革澆浮使家識孝慈人知廉恥杜其利欲之心載以清淨之化自然家肥國富禍亂何由而作上善之特賜鍾乳一劑曰卿進藥石



之言故以藥石相報

咸亨元年二月二十一日西臺舍人徐齊聃上奏曰齊  
獻公陛下外氏雖子孫有犯不合上延於祖今周忠孝  
公廟甚修而齊獻公廟毀壞不審陛下將何以垂示海  
內以彰孝理之風上納之其年三月十九日敕令突厥  
酋長子弟入事東宮齊聃又上疏曰昔姬誦與伯禽同  
業晉儲以師曠為友匪惟專賴師資故亦詳觀近習皇  
太子自可招尋園綺寤寐應劉陛闥小臣必採於端士

驅馳所任並歸於正人方流好善之風永播崇賢之美  
今使氈裘之子解辮而事春闈冒頓之苗削衽而陪望  
苑在於道義臣竊有疑詩云敬慎威儀以近有德書曰  
任官惟賢才左右惟其人蓋殷勤於防微之至也

天授元年壽春郡王成器兄弟五人初出閣同日受冊  
有司授選儀注忘載冊文及百僚在列方知闕禮宰相  
相顧失色中書舍人王勵立召小吏五人各令執筆口  
授分寫同時須臾俱畢詞理典瞻時人歎服

大足元年則天常引中書舍人陸餘慶入令草詔餘慶  
回惑至晚竟不能裁一詞由是轉左司郎中

景龍四年六月二日初定內難唯中書舍人蘇頌在太  
極殿後文詔填委動以萬計手操口對無毫釐差誤主  
書韓禮談子陽職書詔草屢謂頌曰望公稍遲禮等書  
不及恐手腕將廢中書令李嶠見之嘆曰舍人思若湧  
泉嶠所不測也

開元二年十二月二十日紫微令姚崇奏中書舍人六

負每一人商量事諸舍人同押連署狀進訖凡事有是非理均與奪人心既異所見或殊抑使雷同情有不盡臣令商量其大事執見不同者望請便作量狀連本狀同進若狀語交詆恐煩聖思臣既是官長望於兩狀後畧言二理優劣奏聽進止則人各盡能官無留事敕曰可

五年高仲舒為中書舍人侍中宋璟每詢訪故事時又有中書舍人崔琳達於政理璟等亦禮焉嘗謂人曰古

事問高仲舒今事問崔琳又何疑也

十三年行封禪之禮中書令張說自定侍從之官多引  
兩省錄事主書及已之親中書舍人張九齡言於說曰  
官爵者天下之公器德望為先勞舊次焉若顛倒衣裳  
則詛謗起矣今登封需澤千載一遇清品高流不沐殊  
恩胥吏末班先加章紱但恐制出之後四方失望今進  
草之際事猶可改唯審籌之不可貽後悔也說曰事已  
決矣悠悠之談何足慮也後果為宇文融所劾

建中二年六月六日門下侍郎盧杞奏六典云中書舍人給事中充監中外考使重其事也今者有知考使無監考使既闕相臨難令詳練請依舊置監使敕旨令依其年十月舊制中書舍人分押尚書六曹以憑奏報開元初廢其職至是門下侍郎盧杞請復之中書侍郎楊炎固以為不可而止貞元初中書舍人五員皆缺在省唯高叅一人未幾亦以病免唯庫部郎中張濛獨知制誥宰相張延賞李泌累以才可者上聞皆不許其月濛

以姊喪給假或須草詔宰相命他官為之中書省案牘不行者十餘日四年二月以翰林舉士職方郎中吳通微禮部郎中顧少連起居舍人吳通玄左拾遺常執誼並知制誥故事舍人六員通微等與他部郎中張濛凡五人以他官知制誥而六員舍人皆缺焉

十八年八月中書舍人權德輿獨直禁掖數旬一歸家嘗上疏請除兩省官詔報曰非不知卿勞苦以卿文雅尚未得如卿等比者所以久難其人德輿居西掖八年

其間獨掌者數歲及以本官知禮部貢舉事畢仍掌命書

元和十五年二月敕舊制刑憲皆大理寺刑部詳斷聞奏然後至中書裁量多不至兩司中書便自處置自今後先付法司具輕重聞奏下中書令舍人等參酌然後據事例裁斷

十五年閏正月上曰中書舍人職事准故事合分押六司以佐宰臣等判按沿革日久頓復稍難宜漸令修舉



有須慎重者便令叅議知關機密者即且依舊

長慶二年七月敕自今已後負外郎知制誥復授本官者通計二周年然後各依本行轉郎中亦依二周年與正除如是中行後行郎中仍更轉前行一周年即與正除如更是卑官知制誥合轉負外者亦以二周年為限諫議大夫知者同前行郎中給事中并翰林學士別宣並不在此限其年六月武儒衡以諫議大夫知制誥膳部郎中元稹繼掌命書稹常通結內官魏宏簡約車僕

自詣其家不由宰臣而得掌誥時人皆鄙之莫敢言者  
獨儒衡一日會食公堂有青蠅入瓜上忽發怒命掣去  
之曰適從何所來而遽集于此一座皆愕然儒衡神氣  
自若

太和四年七月中書門下奏伏以制誥之選參用高卑  
遷轉之時合係勞逸頃者緣無定制其間多有不均長  
慶二年七月二十七日敕始令自貲外以上及卑官知  
者同以授職滿一年後各從本秩遞與轉官如至前項

正郎即以周歲為限皆計在職日月以為等差不論本  
官年考頗叶通理凡是因職轉叙皆與此文相當其有  
本官已是前行年郎中年已深方被獎用即授官數月  
合正除比類舊制却成僥倖將垂永久須有商量自今  
以後有從前即行中知者並不許計本官日月但約知  
制誥滿一周年即與正授其從諫議大夫知者亦宜準  
此即遲速有據比類可遵並請依長慶二年七月二十  
七日敕處分敕旨依奏 其年十月二十二日敕令後

大理寺結斷用文不當刑部詳覆於事不精即委中書舍人舉書其輕重出入所失之事然後出

會昌四年十一月中書門下奏請復中書舍人故事伏見天寶以前中書舍人六員除樞密遷授之後其他政皆得商量宰臣姚崇奏云事有是非理均與奪人心既異所見或殊抑使雷同情有不盡臣既是官長望於狀後畧言事理優劣奏進聽旨自兵難以來務從權便政頗去於臺閣事多係於軍期決遣繁機專在宰弼伏以

陛下神武功成昧旦思理精覈庶政在廣詢謀詩云不愆不忘率由舊章前漢魏相好觀故事以為古今異制方今務在奉行而已數條漢興以來國家便宜行事奏請施行臣等商量今日已後除機密及諸鎮奏請戎事有司文遣錢穀等其他臺閣常務關於沿革州縣奏請係於典章及刑獄等並令中書舍人依故事商量臣等詳其可否奏聞敕旨從之

大中六年六月敕太和中敕旨條流制誥改轉事頗為

得中實重官業自後因循不守有紊典章遂便遷轉頻  
繁近日却成壅滯自今以後宜舉太和四年舊敕使永  
遵行仍每選知制誥於尚書六行郎中官精擇有文學  
行實公論顯著者以備擢用不得偏取前行正郎餘準  
太和四年七月十三日敕處分

景福二年十月以翰林學士禮部尚書李璣為中書侍  
郎平章事宣制曰水部郎中知制誥劉崇魯抱其麻哭  
之奏云李璣奸邪協附權倖不合為相乃左授太子少

師時宰相崔昭緯與礩不協密遣宗魯沮之

### 諫議大夫

武德五年六月一日置四負龍朔二年二月四日改為  
正諫議大夫神龍元年二月復為諫議大夫至德元年  
九月十日勅諫議大夫論事自今以後不須令宰相先  
知乾元二年四月四日勅兩省諫官十日一上封事直  
論得失無假文言冀成殿最用存董勸大歷七年三月  
十一日其四負外內供奉不尊過正貢數貞元四年五

月十五日分為左右加置八員左右各兩員其右諫議  
隸中書省至元和元年閏六月詔却置四員罷左右名  
貞觀元年正月十五日上謂侍臣曰朕雖不明至於大  
好大惡容或知之幸諸公數相諫正諫議大夫王珪曰  
臣聞木從繩則正后從諫則聖故古聖王必設諫臣七  
人言而不用則繼以死自是中書門下及三品已上入  
內平章國計必使諫官隨入得聞政事有所開說太宗  
必虛已以納之其年上謂侍臣曰為政之道唯在得人



須以德行學識為本諫議大夫王珪對曰人臣若無學業不識前言往行豈堪大任漢昭帝時時有詐稱衛太子聚觀者數萬人莫不致惑京兆尹雋不疑斷以蒯瞶之事由是衆皆信服昭帝曰大臣當用經術明于古義者此固非刀筆俗吏可以比擬上曰信如卿言十七年太宗問諫議大夫褚遂良曰舜造漆器禹雕綦組當時諫舜禹者十有餘人食器之間苦諫何也遂良對曰雕琢害農事綦組傷女工首創奢淫危亡之漸漆器不已

必金為之金器不已必玉為之所以諍臣必防其漸及其滿盈無所復諫太宗以為然因曰夫為人君不憂萬姓而事奢淫危亡之機可反手而待也

永徽四年九月一日左武侯引駕盧文操踰垣盜左藏庫物上以引駕職在糾繩而身行盜竊命有司殺之諫議大夫蕭鈞進曰文操所犯情實難原然準諸常法罪未至死今致之極刑將恐天下聞之必謂陛下輕法律賤人命任喜怒貴財物臣之所職以諫為名愚臣所懷

不敢不奏上納之謂鈞曰卿職在司諫遂能盡規特為  
卿免其死顧侍臣曰真諫議也五年八月十七日太常  
樂工宋四通入內教因以宮人通傳消息上令處斬仍  
遣附律蕭鈞曰四通等所犯在未附律前不合至死上  
曰今喜得蕭鈞之言特免死配流遠處

景龍三年中宗宴侍臣及朝集使酒酣令各為回波詞  
衆皆為諂佞之文及自遷榮位次至諫議大夫李景伯  
曰回波爾時酒卮微臣職在箴規侍宴既過三爵諠譁

竊恐非儀上不說中書令蕭至忠曰此真諫議大夫

大歷十二年四月敕令自今以後諫官所獻封事不限旦晚任封狀進來所由門司不得輒有停滯如須側門論事亦任隨狀面奏即便令引對如有除拜不稱于職詔令不便于時法禁乖宜刑賞未當征求無節冤抑在人並宜極論得失無所迴避以稱朕意其常詔六品以上亦宜准此

貞元二年六月以祕書郎陽城為諫議大夫仍遣長安

縣尉孟寧齋束帛詣城夏縣所據致禮城遂以褐衣赴京師且詣闕上表陳讓上使中使齋章服衣而召見賜帛五十疋其後陸贄李充等以讒毀受譴朝廷懼懼上怒未解勢不可測滿朝無敢言者城聞而起曰吾諫官也不可令天子殺無罪人即率拾遺王仲舒等數人守延英門上疏論延齡奸佞贄等無罪上大怒召宰相臣入語將加城等罪良久乃解令宰相諭遣之於是金吾將軍張萬福武將不識文字亦知感激端笏詣城與諸諫官等

泣而且拜曰今日始知聖朝有直臣時議以為延齡朝  
夕為宰相城獨謂同列曰延齡倘入相吾惟抱白麻慟  
哭後竟坐延齡事改為國子司業

十三年八月以左諫議大夫薛之與為國子司業之與  
少居于海岱之間永泰中淄青節度使李正己辟為從  
事因奉使京師之與逗遛不歸正己召之再三之與報  
曰大夫既未入朝之與焉敢歸使因逃匿於山險間十  
餘年建中後方復任官上知之故賞慰以為諫議大夫

奏諫官所上封章事皆機密每進一封須門下中書兩省印署文牒每有封奏人且先知請別鑄諫院印須免漏洩又累上言時事上不悅故改官未幾以事免

元和四年正月先是諫議大夫段平仲充冊立南詔及弔祭使諫議大夫呂元膺充河南江西宣慰議者以為諫官盡去恐乖大體於是元膺罷行平仲繼止

六年十一月左衛上將軍知內侍省事吐突承璀出監淮南軍時劉希昂與承璀皆久居權任既黜後有李涉

者託附承瓘邪險求投匭上疏曰承瓘公忠才用可輔  
政化既承恩罷不合斥棄諫議大夫知匭使孔戣覽其  
副章大怒命逐之涉乃以賂投光順門達其疏戣聞之  
因上陳古今之佞倖可為鑒戒者又言涉之奸險欺天  
請加顯戮上悟貶涉而黜承瓘焉 十二年十月以比  
部員外郎張宿為權知諫議大夫初上欲以諫議大夫  
授宿宰臣崔羣王涯奏曰諫議大夫前時亦有拔自山  
林及起於卑位者其例則少用皆有由或道德章明不



求聞達或材行卓異出于等倫以此選求實愜公議其  
或事跡未著恩由一時雖有例超遷皆于時論未允張  
宿本非文詞入用望實稍輕臣等所以累有奏請依資  
且與郎中事貴適中非於一人有薄厚請授宿職方郎  
中上命如初羣乃請以權知命之宿為布衣時上在藩  
邸因軍使張茂宗得出入東宮辨謫敢言迨監撫登位  
之時驟承顧倖擢居諫列以舊恩數詔入禁中尋坐不  
密貶郴州郴縣尉十餘年徵入厯贊善補闕比部員外

郎擢為諫議大夫頗恃恩顧掌權者往往因之搏擊宿  
思逞其志頗害清直之士韋貫之出時人亦以為宿有  
力焉宿亦陰事左右以固恩寵及為淄青尉使卒于道  
路正直相賀焉

十四年穆宗即位之始頻出遊晏時吐蕃寇邊諫議大  
夫鄭覃等進奏曰陛下即位以來遊晏過多畋遊無度  
今蕃寇在境緩急奏報不知乘輿所在臣等忝備諫官  
不勝憂惕伏願稍減畋遊留心正道伏聞陛下晨夜昵

狎倡優近習之徒賞賜太厚凡金銀貨帛皆出自生靈膏血不可使無功之人濫霑賞賜縱內帑有餘亦乞用之有節如邊上無急則支用罄言免令有司重斂百姓寔天下幸甚穆宗初不悅其言顧宰相蕭俛曰此輩何人也俛對曰諫官也帝意乃解曰朕之過失臣下盡規忠也召覃謂曰閣中奏事殊不從容今後有事面陳延英相見時久無閣中奏事覃等抗論人皆相賀 十五年十月諫議大夫鄭覃崔郾右補闕辛丘度左拾遺韋

璿溫會於閣中奏事諫以上宴樂過度上曰朕有所關  
臣下能犯顏直諫豈非忠耶宰臣等皆拜舞賀上又謂  
覃等曰允卿所請至延英對宰臣又令慰諭焉

長慶二年三月以處士李源為諫議大夫詔曰禮著死  
綏傳稱握節殞身守位取重人倫為義甚明其風或替  
言念於此慨然興懷而朝之公卿有上言者稱天寶之  
季盜起幽陵振蕩生靈吞噬河洛贈司徒忠烈公李愬  
處難居守正色就屠兩河聞風再固危壁首立殊節至

今稱之其子源有曾閔之行可貫於神明有巢由之風  
可希於太古山林以寄其跡爵祿不入於心泊然无營  
五十餘載夫褒忠可以勸臣節旌孝可以激人倫尚義  
可以鎮澆浮敬老可以厚風俗舉茲四者大倣于時是  
用擢自衡門立於文陛處以諫職冀聞讜言仍加印綬  
式示光寵可守諫議大夫仍賜魚袋河南尹差官命所  
在敦諭發遣初李愬既為祿山所害源方八歲為賊所  
虜流浪南北輾轉人家凡六七年逮洛陽平父之故吏

有識認者以金帛贖之歸于親近代宗聞之授河南府  
叅軍源遂絕酒肉不婚娶不役僮常依洛城北之慧林  
寺即燈之別墅也寓于一室依僧而食人未嘗見其所  
習之業齊榮辱混是非熙熙而處其中蓋自有得也先  
命穴其野以備終制時往眠其間至是御史中丞李德  
裕抗表薦故有是命時源年已八十餘四年八月以  
諫議大夫賈直言為檢校右庶子兼御史丞充昭義軍司  
馬仍賜金紫初直言父德宗時得罪死且飲之以毒藥

直言在側為中使手中掣得藥一飲而盡中使蒼黃復  
奏德宗感其事遂不之罪直言飲藥迷死一日藥漬左  
股而出却得生活體遂偏枯久之李師道請為從事直  
言具以逆順論師道遂以紙畫輜車二枚呈師道師道  
問是何物答曰此是輜車囚送罪人至京師者今天子神  
聖公為反逆不悛必當滅公父子同載于此車送都市  
顯戮豈不悲乎因大哭於前師道命殺之左右感其義  
莫有應者師道懼不敢殺遂牢囚之劉悟破師道得直

言於狴獄中而用之鄆師輸情皆因之以歸軍士無動搖者後失師亦不變于前宰臣上陳謂宜寵其官秩遂非次除諫議大夫劉沔累表乞留云軍中事非直言不可從其請故復有斯授

其年三月十九日上坐朝甚晚自即位以來坐朝皆晚此日尤甚羣臣候朝至宣政門已立數刻至紫宸門又絕晚不召羣官有至不任端立欲頓仆者諫議大夫李渤出次白宰相曰昨已有疏論坐晚今又益晚不能回



上意是某之罪遂出閣門赴伏頭待罪有頃喚入及朝百官趨出左拾遺劉栖楚獨進諫曰歷觀前王嗣位之初莫不躬勤庶政坐以待旦陛下即位以來放情嗜寢樂色忘憂安寢宮闈日晏方起西宮密邇未過山陵鼓吹之聲日喧于內臣伏見憲宗皇帝皆是長君勤恪庶政四方猶有叛亂陛下運當少主即位未幾惡德布聞恐福祚之不久也臣忝位諫官致陛下有此請碎首以謝陛下遂以額叩龍墀輾轉振響之聲聞于閣外門

下侍郎李逢吉懼栖楚致死遂宣言曰栖楚休叩頭聽  
進止栖楚捧首起立又奏宦官中大行時有協比邪人  
動搖國本事又叩頭如前上為之動容以袖連揮栖楚  
栖楚又奏云可臣奏即退不可臣奏臣即碎首而死叩  
頭中書侍郎牛僧孺遽請宣付栖楚云所奏知門外待  
進止栖楚乃拜舞而出以袂掩血行至仗頭憊不能起  
矣栖楚出後宰臣于上前更贊其事上心乃白伏下遂  
降中書宣諭栖楚令歸私第是日聞者莫不感異以為

耳目所聞見諫官論事未有如今日之盛後一日有進止令中使持緋衫牙笏就宅宣賜栖楚旌拜起居郎堅讓不起遂歸東洛至十二月又拜諫議大夫以旌直諫也

會昌二年十二月檢校司徒兼太子太保牛僧孺等奏伏奉十一月二十八日敕中書門下奏諫議大夫巡六典隋氏門下省署諫議大夫七員從四品下正五品上自大歷二年門下中書侍郎為正三品兩省遂闕四品

建官之制有所未備謹案左氏傳衮職有闕惟仲山甫補之能補過也仲山甫即周之大臣漢書汲黯稱願出入禁闥補過拾遺張衡為侍中常居幃幄從容諷議拾遺左右此皆大臣之任其秩峻其任重則君敬其言而用其道况蹇諤之地宜有老成之人秩不優崇則難用耆德其諫議大夫望升為正四品下分為左右以備兩省四品之缺向後為丞郎出入迭用以重其選伏以前代帝王建官設立之制互有沿革升降廢置並視一時

所宜苟得其宜則為當代之美臣等伏據六典故事諫議大夫官歷代之品制位不常定至于諷議之所賴則古今之任不殊今陛下方啓納諫之門俾崇品秩迭用丞郎蓋千年一時之盛美也臣等又據故事諫議大夫掌規諫諷諭侍從贊相今分置左右以備兩省四品之缺臣等叅詳事理衆議僉同伏請著于典章永為定制敕旨依奏

匭

垂拱二年六月置匭四枚共為一室列於廟堂東方木  
位主春其色青配仁仁者以亭育為本宜以青匭置之  
于東有能告朕以養人及勤農之事者可投書青匭名  
之曰延師匭南方火位主夏其色赤配信信者風化之  
本宜以丹匭置之于南有能正諫論時政之得失者可  
投書丹匭名之曰招諫匭西方金位主秋其色白配義  
義者以決斷為本宜以素匭置之于西有欲自陳抑屈  
者可投書于素匭名之曰申冤匭北方水位主冬其色

玄配智智者謀慮之本宜以玄匭置之于北有能告朕  
以謀智者可投書于玄匭名之曰通玄匭宜令諫議大  
夫補缺拾遺一人充使于廟堂知匭事每日所有投書  
至暮並進入又三司授事本防枉滯如有人訴冤屈抑  
不得與投匭之列後方獲申則所由之官節級按罪所  
冀寰中靡隔天下無冤

其始魚保宗上書引揚州道士蔡裕製造焉

理匭以

御史中丞侍御史一人充使

先天元年侍御史徐有功上疏曰陛下所令朝堂受表

設匭投狀空有其名竟無其實並不能直各自防閑延  
引歲時拖曳來去叫閤不達搥鼓不聞抱恨銜冤吁嗟  
而已至誠所感和氣必傷豈不由受任者不副天心是  
陛下務欲使申其寃而有司務在重增其枉塵埃聖德  
掩蔽宸聰者其三司受表及理匭申寃使不速與奪致  
令壅滯臣謹彈奏天寶九載三月十八日改為獻納使  
至德元年十月復改為匭令右補闕閤式請先視其事  
狀然後為投上責壅塞貶式為郎州武陵縣至大歷十



二年十二月二日有敕理匭使但任投匭人投表狀於  
匭中依進來不須勘責副本并妄有盤問及方便止遏  
大厯十四年七月理匭使崔造奏亡官失職婚田兩競  
追理財物等并合先本司本司不理然後省司省司不  
理然後三司三司不理然後合報投匭進狀如進狀人  
未經三處理及事非冤屈輒妄來進狀者不在進限如  
有急切須上間不在此限其妄進狀者臣今後請并狀  
牒送本司及臺府處理敕旨依奏 建中二年六月六

日敕御史中丞依前充理匭使擇諫議大夫一人充知  
匭使貞元三年十二月知匭使右諫議大夫裴信奏其  
使典前準大歷十四年六月十四日敕用四人糧科今  
依六典置二人請置驅使官二人敕旨依奏

長慶三年理匭使諫議大夫李渤奏今後有投匭進狀  
者請事之大者聞奏次申中書門下小者各牒諸司處  
理不當再來投匭即具事聞奏如無理妄訴本罪外加  
一等從之 四年七月理匭使諫議大夫李渤奏伏準

寶應元年五月敕給事中韓賞中書舍人楊綰同充理  
匭使其時二人奏大理評事盧翰充判官又準六典匭  
使常以御史中丞及侍御史為之臺中人吏強幹首控  
百司明敕特并入匭實同創置其官吏手力食料紙筆  
委本司條流聞奏至其年九月遂罷匭使初渤以故事  
至重請增置胥吏及添給課料事多不允渤遂請詔罷  
乃從之

開成三年八月諫議大夫知匭事李中敏奏應舊例所

有投匭進狀及書策文章皆先具副本呈匭使其有詭異難行不令進上檢尋文案不見降敕處所由等云貞元中奏宣恐特是一時之事臣以為之本置匭函每日從內將出日暮進入意在使冤濫無告有司不為申理或論時政或陳利害宜通其必達之路所以廣聰明而慮幽枉若使有司先裁其可否非重其事俾壅遏申於九重之意也臣伏請自今已後所有進狀及封章臣等但為狀引進取舍可否斷自宸衷庶使名實在茲明置

匭之本意敕旨依奏 其月知匭使諫議大夫李中敏  
奏伏準今年八月一日敕朝廷本設諫匭將防漏塞若  
須副本恐不盡言依中敏所奏仍令本司及金吾所由  
須知進狀人姓名住居去處或要召問如過旬日無處  
分即任東西者伏以舊例詣光順門進狀即有金吾押  
官責問住處匭院投狀即本司收投使狀人名便差院  
子審復家第及主人旋牒報京兆府若又令牒金吾責  
狀恐進狀人勞擾又慮煩併今伏請準前准牒京兆府

敕旨依奏敕五年四月敕匭函所投貴達下情近者所  
投文狀頗甚煩碎極言不諱豈假匿名如知朝廷得失  
軍國利害實真寃屈有司不為申明者任投匭進狀所  
由畫時引進其餘並不在投匭之限宜與匭使准此勾  
當仍具副本投會昌元年四月敕應投匭進封事人等  
宜自今後並須將所進文書到匭院驗卷軸入匭函不  
得便進如軸稍大入函不得即依前降使宣取仍永為  
常式 大中四年七月敕應投匭及詣光順門進狀人

其中有曾進狀令所司詳考無可採取放任東西未經  
兩三個月又潛易姓名依前進擾公廷近日頗甚自今  
以後宜令知廳使及閤門使如有此色不得收狀與進  
狀如故違與進者必重書罰

唐會要卷五十五



欽定四庫全書

唐會要卷五十六

宋 王溥 撰

起居郎起居舍人

貞觀六年移起居舍人於門下省改為起居郎顯慶三年十二月十五日又為中書省起居舍人兩貲品同居郎龍朔年改為左右史神龍元年復為起居舍人焉  
蘇氏曰貞觀中每日仗進退後太宗與宰臣叅議政

事即令起居郎一人報簡記錄由是貞觀注記稱為  
畢備及高宗朝會端拱無言有司唯奏辭見二事其  
後許敬宗李義府用權多妄論奏恐史官直書其短  
遂奏令隨仗便出不得備聞機務因為故事

貞觀元年上問中書令房玄齡曰往者周隋制敕文案  
並在否玄齡對曰義寧之初官曹草創將充故紙雜用  
今見並無太宗曰周隋官蔭今並收叙文案既無若為  
憑據因詰中書侍郎劉林甫曰蕭何入關先收圖籍卿

多日在內何因許行此事林甫對曰臣當時任起居舍人不知省事上謂公卿曰為長官不可自專自專必敗臨天下亦爾每事須在下量之至如林甫即推不知也又謂侍臣曰朕每日坐朝欲出一言即思此言於百姓有利益否所以不能多言給事中兼起居杜正倫進曰君舉必書言存左史臣職當修起居注不敢不盡愚直陛下若一言乖於道理則千載累于聖德非直當今有損于百姓陛下慎之上大悅

開元十五年禮部尚書蘓頤卒優贈之制不出起居舍人韋述上疏曰臣伏見貞觀永徽之時每有公卿大臣薨卒皆輟朝舉哀所以成終始之恩厚君臣之義也上有旌賢錄舊之德下有生榮死哀之美列于史冊以示將來故禮部尚書蘓頤累葉輔弼世傳忠清頤又服事軒陛二十餘載入叅謨猷出總藩牧成績斯著操履無虧天不憖遺奄違聖代伏願陛下思惟蓋之舊念股肱之親循先朝之盛事鑒晉平之遠跡為之輟朝舉哀以

明同體之義使沒者荷德于泉壤存者盡節于周行凡百卿士孰不幸甚上即日舉哀洛城南面輟朝兩日贈尚書右丞相貞元十二年正月宰相賁虢盧邁皆假故趙憬獨對延英上問曰近日起居所注記何事憬奏曰古者左史記事右史記言人君動止有言有事即隨記錄今起居之職是也國朝自永徽以後起居雖得對伏承旨伏下後謀議皆不得聞其所注記但於制敕內採錄更無他事所以長壽中姚璿知政事以為親承德

旨謨訓若不宣自宰相史官無從得書遂請仗下後所言軍樞政要專知撰錄號為時政每月送史館無何此事又廢上曰君舉必書義存勸誡既嘗有時政紀宰相宜依故事為之

元和十二年九月敕記言記事史官是職昭其法誠著在典常如聞近者難得詳實思有釐改用存舊章舉而必書朕所深望自今以後每坐日宰臣及諸司對仗如有事可稱勸誡合紀述者按其日承旨宰相宣示左右

起居令其綴錄仍准舊例每季送史館以為常例自隋氏因前代史官有起居注故置起居舍人以紀君舉國朝因之貞觀初置中書省舍人顯慶中始兩置之分侍左右仗下秉筆隨相入禁殿命令謨猷皆詳錄若仗在紫宸閣內則夾香案分立殿下正直第二螭首和墨濡翰皆即螭首之坳處由是諺傳謂螭頭有水官既密侍號為清美永徽之後始與百官仗下俱退長壽年中姚璹為相以史官不聞獻替表請宰臣一人撰錄軍國政

要號為時政紀隨月移之史館及起居既錄自宰臣事  
同銘述於是推美讓善之義行而信史直書之義闕既  
而歲月稍久樞務復繁注記漸簡未幾皆廢其後執事  
者時或修綴百無一二而右史所守猶因于制敕時存  
筆札至于左史職在記言但編集書繕寫而已至是起  
居舍人唐敬休上疏求復故事累請于時宰皆樂復焉  
既陳奏而制行故事漸復公議稱美十四年十月出  
起居舍人裴潁為江陵令上近年垂意方士及李道古



薦柳垞上益信金丹藥石之說推心服之無疑焉裴潁  
抗疏論諫聽用方士故及於貶或有竊知者傳言時頗  
惜之其疏曰臣聞除天下之害者受天下之利共天下  
之樂者饗天下之福故上自黃帝顓頊堯舜禹湯下及  
文王武王咸以功濟生靈德配天地天皆報之以上壽  
垂祚于無疆伏惟陛下以大孝安宗廟以至仁育黎元  
自踐阼以來刻積代之妖凶開削平之洪業而又敬禮  
宰輔待以始終內能大斷外寬小故夫此神功聖化皆

自古聖主明君所不能及今陛下躬親行之實光映千古矣是則天地神祇必報陛下以山岳之壽宗廟聖靈必福陛下以億萬之齡四海蒼生咸祈陛下以覆載之永自然萬靈保佑聖壽無疆伏自去年以來諸處薦藥術之士有韋山甫柳泌等或更相稱引迄今薦送漸多臣伏以古真仙有道之士皆匿其名無求於世潛遯山林滅影雲壑唯恐人見唯恐人聞豈有干謁公卿自鬻其術今者所奏有夸術其藥術者必非知道之士咸為

求利而來自言飛鍊為神以誘權貴賄賂大言怪論驚  
聽惑時及其假偽敗露曾不恥于遯逃如此情狀豈可  
信其術親餌其藥哉禮曰夫人食味別聲被色而生者  
也春秋左氏傳曰味以行氣氣以實志又曰水火醯醢  
鹽梅以烹魚肉宰夫和之濟之以味君子食之以平其  
心夫三牲五穀稟自五行發為五味蓋天地生以奉人  
是以聖人節而食之以致康強之福若夫藥石者前聖  
以之療疾蓋非常食之物况金石皆含酷烈熱毒之性

加之燒治動經歲月既兼烈火之氣必恐難為防制若  
乃遠徵前史則秦漢之君皆信方士至于盧生徐福藥  
大李少君其後皆姦偽事發藥竟無成事著史記漢書  
皆可驗視禮曰君之藥臣先嘗之親之藥子先嘗之臣  
子一也所有金丹之藥伏乞先令鍊藥之人及所薦之人  
皆先服一年以考其真偽則自然驗矣伏惟元和聖文  
神武法天應道皇帝陛下合日月照臨之明稟乾元利  
貞之德崇正若指南受諫如轉規是必發精金之刃斷

可疑之網所有藥術虛誕之徒伏乞特賜置遣禁其幻惑使浮雲盡徹朗日增輝道化侔羲農悠久配天地寔在於此矣伏以貞觀以來左右起居有褚遂良杜正倫呂向韋述等咸能竭其忠誠悉心規諫臣謬叅侍從職奉起居侍臣之中最近左右傳曰近臣盡規則近侍之臣上達忠款實其本職也

太和九年十二月敕宣令起居郎起居舍人准故事入閣日齋紙筆於螭頭下記言記事

開成三年魏謩自左補闕授起居舍人紫宸中謝日文  
宗謂之曰以卿論事忠切有文貞之風故不循月限授  
此官又謂之曰卿家有何舊書謩對曰比多失墜惟  
簪笏見存上遂令進來時宰相鄭覃奏曰在人不在笏  
文宗曰鄭覃殊不會我意此即甘棠之義非在笏也謩  
將退又召謩之曰事有不當即須論奏對曰臣頃為諫  
官合伸規諷今居史職職在記言臣不敢輒踰職分文  
宗曰凡兩省官並合論事勿拘此言尋以本官兼值弘

文館

大中六年九月敕郎官御史遺補皆有月限唯起居未有分明制置自今以後特恩超擢外宜中滿二十個月為改轉

左右補闕拾遺

垂拱元年二月十九日敕記言書事每切於旁求補闕拾遺未弘於歷選瞻言共理必藉衆才寄以登賢期之進善可置左右補闕各二員從七品左右拾遺各二人

從八品命掌供奉諷諫行次立于左右史之下仍附甲  
令至天授二年二月五日各加置三員通前五員大歷  
四年十二月一日補闕拾遺各置內供奉兩員又七年  
五月十一日補闕拾遺各加置兩員天寶三年左補闕  
薛謙光上疏曰戎夏不雜自古所誠蕃戎無信易動難  
安故斥居塞外不入中國前史所稱其來已久然而帝  
德廣被有時朝謁願受向化之誠請納梯山之禮貢事  
畢則歸其父母之國導以指南之車此三王之盛典也



自漢魏以來遂革其風務飾虛名徵求侍子諭令解甲  
使襲衣冠築室京師不令歸國此又中葉之故事也較  
其利害則三王是而漢魏非論其得失則拒邊長而徵  
質短殷鑒在乎往世豈可不懷經遠之慮哉昔郭欽獻  
策于武皇江統納簡于惠主咸以為夷狄處中夏必為  
變更二主不納二臣之遠策好慕向化之虛名縱其習  
史漢等書官之以五部都尉皆失計也竊惟突厥吐蕃  
契丹等往因入侍並叨殊獎或執戟丹墀策名戎秩或

曳裾庠序高步黌門服改毳裘語兼中夏明習漢法觀  
衣冠之儀目擊朝章知經國之要窺成敗於圖史察安  
危于古今識邊塞之盈虛知山川之險易或委以經畧  
之功令其展效或矜其首邱之志放使歸蕃於國家雖  
有冠帶之名在戎狄廣其縱橫之智雖有慕化之美苟  
悅于當時而狼子辜恩旋生于過後及歸部落鮮不稱  
兵邊鄙罹灾實由于此故老子曰國家之利器不可以  
示人在于齊人猶不以示之況于戎寇乎又按漢桓帝

遷五部匈奴于汾晉其後卒有劉石之難向使五部不徙則晉祚猶未可量也鮮卑不遷幽州則慕容無中原之僭又按漢書陳湯云匈奴兵五而當漢兵一何者兵刃朴鈍弓弩不利今聞頗得漢工然猶三而當一由是言之利兵尚不當使之得法況處之中國而使其習見哉臣竊計漢初冒頓之強盛乘中國之虛敝高祖餒厄平城而冒頓不能入中國者何也非兵不足以侵諸夏力不足以破汾晉其所以解圍而縱高祖者為不習中

土之風不知中國之美生長磧漠之北以穹廬賢于城  
邑以氊罽美于章紱既安其所習而樂其所生是以無  
中國之心者為生不在漢故也豈有心不樂漢而欲深  
入者乎劉元海五部離散之餘而卒能自振于中國者  
為少居內地明習漢法元海悅漢而漢亦悅之一朝背  
誕四面響應遂鄙單于之號竊帝王之寶賤沙漠而不  
居推平陽而鼎峙者為居漢故也向使元海不曾內徙  
止當却遼人繒綵趨藥以歸陰山之北安能使王彌崔

懿為其用耶當今皇風遐覃含生草面凡有虺性莫不  
懷馴方使由余効忠日殫盡節以愚臣慮者國家方傳  
丕祚于後脫備守不謹邊防失圖則構釁稱兵不在外  
方非所以肥中國制四方經營萬乘之業貽厥孫謀之  
道也臣愚以為願充侍子者皆一禁絕必若先在中國  
者亦不可更使歸蕃則夷人保疆邊邑無事矣疏奏不納  
萬歲通天元年孫萬榮等陷河北數州河內王懿宗擁  
兵不敢進比賊敗懿宗奏請族誅滄瀛等州百姓為註

誤者左拾遺王求禮廷折之曰此百姓等素無良吏教習城池又不完固見賊畏懼苟且從之今請殺之是將違背天道而懿宗擁強兵數聞賊將至輒退賊入城池罪當誅戮今乃移禍于草澤誑誤之人以求自免豈是為臣之道請先斬懿宗以謝河北百姓羣官愕然謂之切當遂令魏州刺史狄仁傑充使安撫流移

長壽二年右補闕朱敬則以宜絕告密羅織之徒上疏曰臣聞李斯之相秦也行申商之法重刑名之家杜私門強公

室棄無用之費損不急之官惜日愛功急耕疾戰人繁  
國富遂并諸侯此救弊之術也故曰刻薄可施于趨進  
變詐可陳于攻戰兵猶火也不戢自焚况鋒鏑已銷石  
城又毀諒可易之以寬泰潤之以淳和八風之樂以柔  
之三代之禮以導之秦既不然淫虐滋甚往而不返卒  
至土崩此不知變之禍也陸賈叔孫通之事漢王也當  
滎陽城舉之間糧饋已窮智勇已竭不敢開一說効一  
奇進豪猾之材薦貪暴之客及區宇適平干戈向戢金

鼓之聲未歇傷痍之病尚聞二子顧盼雍容綽有餘態  
乃陳詩書說禮樂闡王道謀帝圖高皇帝忿然曰吾以  
馬上得之安事詩書乎對曰陛下馬上得之安可馬上  
理之乎高皇默然於是陸賈著新語叔孫通定禮儀始  
知天子之尊方覺帝王之貴此則知變之善也向使高  
皇排二子而不顧重攻戰之吏尊首級之材複道爭功  
張良已知其變拔劍擊柱若屬不得無謀即晷漏難逾  
何十二帝乎亡秦是續何二百年乎故曰仁義者聖人



之蘧廬禮樂者先王之陳迹然則祝詞向畢芻狗須焚  
滑稽已流糟粕可棄仁義尚舍况輕于此者乎自文明  
草昧天地屯蒙三叔流言四凶構難不設鈞距無以應  
天順人不峻刑名不可推奸息暴故置神匱以開告端  
曲直之影必呈包藏之心盡露神道助直無罪不除人  
心保能無妖不戮以茲妙算窮造化之幽深用此神謀入天人  
之祕術故能計不下席聽不出闥蒼生晏然紫宸易主  
大哉偉哉無得而稱也豈比造攻鳴條大戰牧野血變

草木頭折不周可同年而語乎然而急行無善跡促柱  
少和聲拯溺不規行療飢非鼎食即向時之妙策乃當  
今之芻狗也伏願覽秦漢之得失考時事之合宜審糟  
粕之可遺覺蘧廬之須毀見幾而作豈勞終日乎陛下  
必不可偃蹇太平徘徊中路伏願改法制立章程下怡  
愉之詞流曠蕩之澤刻萋菲之牙角頓奸險之鋒鋌杜  
告訐之源絕羅織之迹使天下蒼生坦然大悅豈不樂  
哉

神龍元年二月十四日追贈后父韋玄貞為上洛郡王  
左拾遺賈虛已上疏曰臣聞孔子曰惟名與器不可以  
假人其非劉氏而王自古盟書所棄今陛下創制謀始垂  
範將來為皇王之令圖子孫之明鏡匡復未幾后父有  
私臣庸愚尚知不可史官執簡必直書今萬姓顚然聞  
一善令莫不歌頌向風忻然慕化日恐不及陛下奈何  
行私惠使樵夫議之即先朝贈太原王殷鑒不遠同雲  
生于膚寸尋木起于蘗莪誠可惜也如渙汗已行憚改

成命臣望皇后抗表固辭使天下知引讓之風彤管著  
謙沖之譽是則巍巍聖德無得而稱疏奏不納

二年八月節愍太子之亂兵部尚書宗楚客侍御史冉  
宗雍共劾安國相王及太平公主與太子連謀請收付詔  
獄右補闕吳兢上疏曰臣聞庶物不可以自生陰陽以  
之亭育大寶不可以獨守子弟成其藩翰武王聖主也  
成王賢嗣也然封建魯衛以匡社稷所以龜鼎相傳七  
百餘載始皇繼昭襄之業承戰爭之弊忽先王之典制

比宗親于黔首孤立無輔二代而亡漢諸呂用權將傾  
劉氏朱虛為其心腹絳侯作其牙爪劉氏復安豈非宗  
子之力國之安危在于藩屏故設官分職先親後疎且  
安國相王者陛下之同氣六合至廣親莫加焉今賊臣  
同謀欲寘極法此禍亂之漸不可不察伏願陛下降明  
旨曉羣邪下全棠棣之美上慰罔極之心則羣生幸甚  
景雲元年左補闕辛替否論時政上疏曰臣請以有唐  
以來理之得失陛下之所眼見者以為言陛下聽之太

宗文皇帝陛下之祖得至理之體設簡要之方省其官  
清其吏舉天下之職司無一虛設用天下之財帛無一  
枉費不多造寺觀而福德日至不多度僧尼而殃咎自  
滅自古帝王未有若斯之神聖也陛下何不取而則之  
孝和皇帝陛下之兄居先人之業忽先人之化不取賢  
良之言而恣妻女之意官爵非擇虛食祿者數千人封  
建無功妄食土者百餘戶造寺不止枉費錢數百億度  
人不休免租庸者數千萬倉不停卒歲之儲庫不停兩

年之帛奪百姓口中之食以養貪殘剥萬人體上之衣以塗土木於是人怨神怒水旱不調享國不永受終於凶婦人此陛下之所眼見何不棄而改之今陛下旌阿韋之凶宗而不改阿韋之亂政忍棄太宗文皇之理本不忍棄孝和之亂階陛下又何以繼祖宗而觀萬國昔陛下在阿韋之時危亡是懼常切齒于羣凶今貴為天子富有四海內不改羣凶之事臣恐復有切齒于陛下者也先朝之時愚智知敗人雖有口而不敢言言未發

聲禍將及矣韋月將受誅于丹徼燕欽融見殺于紫庭  
此人皆不惜其身而納忠于主身既死矣主亦危矣是  
故先朝誅之陛下賞之是陛下知直言之事有裨于國  
臣今日愚言亦當代之直伏惟察之

先天元年正月大酺睿宗御安福門觀百司宴酺經月  
不息右拾遺嚴挺之上疏曰夫酺者因人所利合醵為  
歡無相奪倫不至糜弊且臣卜其畫史策猶存君舉必  
書帝王重慎今乃暴衣冠于路上羅妓樂于中宵雜鄭



衛之音縱娼優之樂陛下還淳復古宵衣旰食不矜細  
行恐非聖德所宜臣以為一不可也誰何警夜伐鼓通  
晨以備非常古之善教今陛下不深惟戒慎輕違動息  
重門弛禁巨猾多徒倘有躍馬奔車流言駭叫一塵聽  
覽有累宸衷臣以為二不可也一人向隅滿堂不樂一  
物失所納隍增慮倘令有司跛倚下人饑倦陛下近有  
不恤况于遠乎臣以為三不可也且正元首祚大禮頻  
光百姓喁喁咸謂業盛配天功垂曠代今陛下恩已薄

於衆聖黼即過于往年王公大人各承徽旨州縣坊曲競為課稅損萬民之財營百戲之資臣以為四不可也伏願畫則歡娛暮令休息若令繼夜無益聖明從之

廣德二年九月二十一日敕諫官令每月一上封事指陳時政得失 永泰元年正月二十三日敕諫官奏事不須限官品次第於每月奏事官數內聽一人奏對大歷十二年四月十二日敕自今以後諫官所獻封事不限早晚任封狀即時進

十二年七月賜右補闕姚南仲緋遷左拾遺何士幹為左補闕時葬貞懿皇后代宗恩寵所屬令繕陵寢通章敬寺後為遊幸近地左右莫敢言南仲等上疏極諫代宗覽表歎息立從其議因錫南仲緋遷士幹官以褒之是日遣常內侍吳承情宣慰百僚令數事

元和元年九月以拾遺杜從郁為秘書丞從郁司徒佑之子初自太子司議郎為右補闕左拾遺崔羣韋貫之右拾遺獨孤郁等奏以為宰相之子不合為諫諍之官

於是降左拾遺羣等又奏云拾遺與補闕雖資品不同而皆是諫官父為宰相而子為諫官若政有得失不可使子論父於是改授十五年八月山陵始復土先是追邠寧節度使李光顏徐泗節度使李愬赴闕或言欲重陽節與百寮內宴拾遺李珣字文鼎溫會韋瓘馮約等上疏曰臣聞人臣之節本于忠藎苟有所見宜即上陳況臣等為陛下諫官食陛下美祿豈得隱默孤負恩榮聞諸道路不知信否皆云追光愬及重陽令節欲

內宴百寮倘誠有之乃陛下親羣臣宏德澤之慈旨也  
然伏以元朔未改園陵尚新雖陛下就易月之期俯從人欲  
而禮經著三年之制猶服心喪遵同軌之會適去于中邦告  
遠夷之使未復其誠命過密弛禁蓋為齊人合讌內廷事將未  
可夫明主行為天下則言為天下法臣恐王言忽降其  
出如綸苟秦皇猷徒彰直諫臣等是以昧死上聞曲突  
徙薪義實在此其光顏李愬久統戎旅皆有忠勞今者  
時當盛秋務切邊寇及是之日陛下降恩召見詢訪才

謀褒其舊勲付以疆事如此則與夫歌鐘賜宴酒食邀  
歡固不同年而語矣臣竊見陛下自臨御以來施號發  
令無非孝理因心屢形于詔敕行已實感于人倫惟在  
敬慎威儀保全聖德臣等不敢緘默輒貢狂言懼不允  
當伏待刑憲

寶曆元年閏七月右拾遺薛延老與同僚入閣奏事曰  
臣伏見近日除拜往往不由中書進擬多是內中宣出恐  
紀綱漸壞奸邪恣行上曰更諫何事拾遺舒元褒曰近

宮室修造太多延老曰臣等職在諫官凡有所聞即合  
論奏乞勿罪其言上改容勞之其年十一月以右拾  
遺內供奉史館修撰薛延老為河中府臨晉令時鄭權  
因交通鄭注得嶺南節度權到任後盡以庫中所有輦  
送京師酬遺權幸延老周知上疏請按由是釁結中外  
人盡危之延老性本強直未幾又議張權與程昔範不  
宜居諫官之列事皆不行遂自請假滿十旬為宰相李  
逢吉所出二年九月以新授濠州刺史陳岵為太常

少卿嵎常好釋氏學佛經中尤好維摩自為有得即加  
注釋輒復上獻遂有宣令與好官乃追前命列在清賢  
羣議紛然諫官劉寬夫等七人同疏論奏謂嵎由徑求  
事因供奉僧進經上覽疏謂所言不實宣與宰相等云  
陳嵎所進經寔不因僧諫官何處得此語卿等可即勘  
問并推排頭首奏來左補闕劉寬夫上表自言昨論嵎  
之時不記得先後唯執筆草狀即是微臣今既論事不  
當臣合當罪若令尋究根本自相推排恐或遽相誣執



有損事體凡所論差誤臣盡甘當罪疏奏敕諫官六人各罰一季俸劉寬夫獨能當罪釋放然嵒尋改少府監太和元年十一月敕以右補闕高允中為侍御史允中自為諫官甚舉職業危言直論不避時忌竇厯中常上疏云東頭勢重于南街樞密權傾于宰相敬宗感悟久之雖無明賞而直名昭然人情危懼恐有禍及終至非辜至是稍遷正人相賀三年五月左拾遺舒元褒等奏今年四月左補闕李虞與御史中丞溫造街中相逢

溫造怒李虞不迴避遂提李虞祇承人車從送臺中禁身一宿與脊杖十下者臣等謹按國朝故事供奉官行除宰相外無迴避今溫造滅棄朝廷典故陵陛下近官恣行胸臆曾無畏忌伏以事雖小而關分理者不可失也分理失亂由之而生拾遺補闕官秩雖卑乃陛下侍臣也御史中丞官秩雖高乃陛下法吏也侍臣見凌是不廣敬法吏壞法何以持繩臣等又聞元和長慶中御史中丞行李遵從不過半坊今乃遠至兩坊謂之籠街

喝道唯以尊崇自處不思僭擬之嫌陛下若不因此時  
特有懲革伏恐從此供奉官輩便須迴避中丞累聖制  
度失自陛下臣等官叅諫列實為陛下惜之救憲綱之  
設在指佞觸邪不在行李自大侍臣之職在獻可替否  
不在道途相高其臺官與供奉官同道聽先後而行遇  
途但祇揖而過其叅從各隨本官之後少相迴避勿信  
衝突自今已後應各有遵從官行李傳呼前後並不過  
三百步

會昌四年六月中書門下奏諫官論事臣等商量望令  
各陳所見不要連狀涉于糾雜如有大段意見及朝廷  
重事必須連狀者即令同商量進狀不得輒有代署敕  
旨依奏

咸通四年十一月以長安縣尉令狐滈為左拾遺左拾  
遺劉蛻起居郎張雲奏滈父絢秉權之日廣納賂遺取李  
琢財物除安南致蠻寇侵擾不當居諫官之列時絢鎮  
淮南上表論訴乃貶雲興元少尹蛻華陰令

符寶郎

本名符璽郎延載元年五月十一日改為符寶郎神龍  
元年正月二十二日復改為符璽郎開元元年十一月  
十日敕傳國八璽既改為寶其符璽郎宜改為符寶郎  
矣舊制天子八寶一曰神寶所以承百王鎮萬國二曰  
受命寶所以修封禪禮神祇三曰皇帝行寶答疏於王  
公則用之六曰天子行寶答四夷書則用之七曰天子  
之寶慰撫蠻夷則用之八曰天子信寶發番國兵用之

貞觀十六年太宗刻受命玄璽白玉為螭首其文曰皇  
天景命有德者昌 天寶五載六月十一日敕玉璽既  
改為寶其璽書可從之至十載正月後改傳國寶為承  
天寶

典儀

皇朝置二人隸門下省初用人皆輕至貞觀末李義府  
為之是後常用士人焉

唐會要卷五十六